

VP Schmidt na Bledskom strateškom forumu pozvao na proaktivan angažman političara i civilnog društva u BiH



Visoki predstavnik Christian Schmidt je imao niz sastanaka na visokom nivou na marginama ovogodišnjega Bledskog strateškog foruma na kojima se govorilo o napretku u Bosni i Hercegovini i regiji Zapadnog Balkana, kao i o integracijskim i sigurnosnim perspektivama cjelokupne regije u kontekstu proširenja EU.

Visoki predstavnik je zahvalio ministrici vanjskih i evropskih poslova Slovenije Tanji Fajon na impresivnom i upornom zalaganju Slovenije za integraciju zemalja Zapadnog Balkana u EU. Nadalje je pohvalio najavu predsjednice Evropske komisije Ursule von der Leyen da će jedan komesar biti zadužen da se brine za države koje su aplicirale za članstvo u EU, pri čemu je eksplicitno navela i Bosnu i Hercegovinu.

Tokom razgovora, visoki predstavnik je rekao da EU i dejtonske strukture trebaju ići paralelno i raditi kako bi se zemlji osigurala održiva budućnost. Više puta je ponovio značaj otvaranja pristupnih pregovora BiH sa EU, ističući kako je neophodan jasan i proaktivan angažman domaćih političara i civilnog sektora u Bosni i Hercegovini kako bi se ovaj proces

kretao u pravom smjeru za dobrobit svih građanki i građana. BiH mora ubrzati tempo i rješavati ključne probleme imajući u vidu zajedničke prioritete. Tako će politička elita pokazati svome građanstvu i međunarodnim partnerima da je spremna za jasan politički iskorak i ozbiljnost na daljnjem putu reformi i integracija.

U okviru Bledskog strateškog foruma, visoki predstavnik je prisustvovao panel diskusiji "Evropa cijela i slobodna: Proširenje kao strateški projekat pomirenja" o odlučnoj fazi procesa proširenja EU započetog u Solunu prije više od 20 godina, te neophodnosti prilagodbe ovog procesa aktuelnim geopolitičkim izazovima.